

Minat, Aspirasi dan Sokongan Politik Belia IPT Malaysia

MOHD FUAD MAT JALI, YAHAYA IBRAHIM, NOOR AZIAH MOHD AWAL,
ABDUL HALIM SIDEK & KHAIDZIR ISMAIL

ABSTRAK

Mahasiswa di Institut Pengajian Tinggi merupakan kumpulan belia elit dan terpelajar. Di samping mempelajari pelbagai disiplin ilmu, mereka juga bergiat dalam aktiviti politik kampus. Pola perlakuan politik mereka mampu menggugat suasana politik kampus dan nasional. Justeru, kajian ini bertujuan untuk menganalisis sokongan dan perlakuan politik di kalangan 5200 belia daripada 20 Institusi Pengajian Tinggi Awam (IPTA) dan 12 Swasta (IPTS) terhadap kerajaan dan faktor yang mempengaruhinya. Berdasarkan pemerhatian dan soal selidik, hasil kajian menunjukkan bahawa minat politik di kalangan belia IPT adalah pada tahap sederhana dan hanya 27.7 peratus daripada mereka telah mendaftar sebagai pengundi dan 12.3 peratus yang menyatakan telah menjadi ahli sesebuah parti politik. Internet merupakan sumber maklumat utama politik mereka di samping televisyen dan akhbar harian perdana. Belia IPT menyatakan mereka memilih calon berdasarkan kriteria pencapaian akademik, seagama, latar belakang agama yang baik dan persamaan ideologi politik. Manakala parti yang dipilih pula berdasarkan perjuangan agama dan bangsa, isu kemanusiaan dan pembangunan. Aspirasi mereka mahukan kerajaan lebih prihatin terhadap kebajikan belia, mewujudkan lebih banyak peluang pekerjaan, lebih banyak kebebasan bersuara, pembasmian rasuah dan kemiskinan, mahukan AUKU dipinda dan ISA terus dikekalkan. Hasil kajian juga mendapati bahawa 54.6 peratus daripada belia IPT menyokong Barisan Nasional (BN) berdasarkan aspirasi dan sebaliknya 45.7 peratus akan menyokong BN dalam pilihan raya akan datang. Majoriti daripada mereka memilih dan menyokong Dato' Seri Najib Tun Razak sebagai tokoh yang paling layak menjadi Perdana Menteri Malaysia yang ke-6 dan Tan Sri Muhyiddin Yassin sebagai gandingan yang sesuai.

Kata kunci: *Politik kampus, belia, aspirasi, pilihan raya, minat politik, perlakuan politik*

ABSTRACT

Students in the Institute of Higher Learning (IHL) are a group of elite and educated youth. Besides learning various disciplines of knowledge, they also participate in campus politics. With the pattern of their political behavior it is not possible to change the campus and national political scenarios. Hence, this study is aim to analyze the political support and behavior among 5200 students from 20 Public IHL and 12 Private IHL towards the government. The results of this study shows that the political interest among IHL youths are moderate and only 27.7 per cent of them have registered as voters and 12.3 per cent have registered as

members of a political party. Internet was their main source of political information beside television and daily main stream newspapers. They prefer candidates with higher academic qualification, good religious background and have the same religious faith and political ideology. On the other hand they prefer political party which fights for the religion and race, humanitarian issues and development. They want the government to pay more attention towards their welfare, create more job opportunities, widen the freedom of speech, fight against corruption, poverty and revise on AUKU and ISA to be maintained. The result of the study also shows that 54.6 per cent of the IHL youth support the Barisan Nasional (BN) based on aspiration and 45.7 per cent will vote BN in the next general election. Majority of them choose and support Dato' Seri Najib Tun Razak as the sixth Prime Minister of Malaysia and Tan Sri Muhyiddin Yassin as his suitable partner.

Key words: *Campus politics, Youth, Aspiration, Election, Political Interest, Political Behaviour*

PENGENALAN

Universiti merupakan salah sebuah institusi sosial yang penting dan dipandang tinggi oleh masyarakat kerana mengeluarkan sebahagian besar golongan terpelajar dan bakal pemimpin. Semasa di Kampus Mahasiswa di ajar pelbagai disiplin ilmu di samping mengikuti kegiatan kokurikulum. Salah satu aktiviti yang diceburi secara meluas oleh Mahasiswa ialah politik kampus dan mengikuti perkembangan politik nasional. Ia merupakan sebahagian daripada budaya kampus yang mengasuh kepimpinan individu dan organisasi selaras dengan hasil dari pembelajaran pelbagai disiplin ilmu. Pola perlakuan mahasiswa juga banyak dipengaruhi oleh kedudukan status sosioekonomi dan pergolakan politik semasa di luar kampus. Gerakan politik pelajar mampu mencetuskan masalah dalam kampus dan luar kampus apabila melibatkan isu masyarakat, polisi dan kepimpinan. Universiti juga dilihat sebagai institusi yang ramai menempatkan belia atau pengundi muda dan sokongan mereka terhadap kerajaan amat penting dalam mencorakkan pola politik negara. Di Indonesia umpamanya gerakan pelajar sebagai golongan pendesak terbesar telah memainkan peranan menjatuhkan kerajaan Presiden Suharto. Di Thailand, Filipina, Cuba, Korea Selatan, Eropah dan juga Amerika, gerakan politik pelajar kampus telah menggugat kesejahteraan sosial dan keselamatan negara.

Malaysia juga tidak terlepas dari gejala politik belia kampus bermula tahun 1960-an dan awal tahun 1970-an dengan berlakunya beberapa demonstrasi. Fenomena tersebut memuncak pada akhir tahun 1990-an dengan berlakunya rusuhan yang mengancam keselamatan negara. Kegiatan politik belia kampus telah menjangkau kepada kegiatan politik nasional dan dalam pilihan raya. Sebilangan mereka telah melibatkan diri secara individu atau berkumpulan berkempen untuk parti politik tertentu, menjadi ahli, menentang atau pengkritik dasar kerajaan dan turut serta dalam demonstrasi jalanan. Persoalannya mengapakah fenomena ini berlaku? Adakah minat dan kesedaran politik mereka telah berubah kerana dipengaruhi oleh keadaan politik atau isu-isu semasa? Atau adakah ianya hasil daripada sosialisasi dan sistem pendidikan negara? Apakah aspirasi

mereka sebenarnya sebagai pelajar terhadap kerajaan. Sejauh manakah media alternatif mempengaruhi fahaman politik mereka? Dan apakah kriteria parti atau calon yang mereka mahukan? Oleh itu adalah tujuan artikel ini untuk menjawab persoalan tersebut agar kita dapat mengetahui antara lain sumber maklumat politik, aspirasi, pilihan politik dan faktor yang menyebabkan belia di Institut Pengajian Tinggi (IPTA dan IPTS) menyokong kerajaan atau sebaliknya.

DATA

Sampel dalam kajian ini dipilih daripada 20 IPTA dan 12 IPTS. Institut Pengajian yang terlibat ialah Universiti Kebangsaan Malaysia (UKM), Universiti Malaya (UM), Universiti Putra Malaysia (UPM), Universiti Teknologi Mara (UiTM), Universiti Islam Antarabangsa Malaysia (UIAM), Universiti Sains Malaysia (USM), Universiti Teknologi Malaysia (UTM), Universiti Pendidikan Sultan Idris (UPSI), Universiti Utara Malaysia (UUM), Universiti Malaysia Sabah (UMS) dan Universiti Malaysia Sarawak (UNIMAS), Universiti Malaysia Perlis (UniMAP), Universiti Pertahanan Nasional Malaysia (UPNM), Universiti Darul Iman (UDI), Universiti Malaysia Terengganu (UMT), Universiti Malaysia Kelantan (UMK), Universiti Malaysia Pahang (UMP), Universiti Tun Hussein Onn Malaysia (UTHM), Universiti Teknikal Malaysia Melaka (UTeM) dan Universiti Sains Islam Malaysia (USIM). Bagi IPTS pula ia melibatkan, Universiti Tun Abdul Razak (UNITAR), PTPL Sungai Petani, PTPL Kota Kinabalu, Universiti Tunku Abdul Rahman (UTAR), *HELP College University*, Kolej Teknologi Bestari, Kolej Teknologi Darul Naim, *INTI International University College* (Nilai), *Nilai International College*, Kolej INTI Sabah, Kolej SEGI dan Kolej *Twintech*. Seramai 5200 (4000 IPTA dan 1200 IPTS) mahasiswa lelaki dan perempuan telah dipilih berumur 19 hingga 24 tahun mengikut kaum, fakulti dan tahap pengajian. Soal selidik telah dilakukan pada tahun 2008 dan 2009 oleh pembantu penyelidik (pembanci) yang terdiri daripada pelajar sarjana yang telah dilatih dan diberi taklimat sebelum menjalankan soal selidik.

KAJIAN POLITIK BELIA

Grenfell (1979) adalah antara pengkaji yang terawal menjalankan pungutan pendapat di Malaysia pada tahun 1959 mengenai penggunaan media massa. Beliau mendapati pungutan pendapat awam berkembang dengan tertubuhnya indeks media pada tahun 1967 dan membuktikan bahawa kempen melalui media massa mempengaruhi tahap sokongan parti di kalangan pengundi. Media juga telah memainkan peranan penting bagi kemenangan BN dalam pilihan raya umum 1995 (Syed Arabi dan Mazni, 1995). Ia dijadikan sebagai saluran penyampaian maklumat pembangunan kerajaan BN yang memerintah Malaysia dan sebagai alat propaganda politik untuk memburukkan parti lawan atau pembangkang. Gomez (1996) juga mengaitkan media, wang, jentera dan Mahathir (*Media, Money, Machinery & Mahathir*) sebagai faktor kemenangan BN dalam pilihan raya umum tersebut. Ia memberikan kelebihan kepada BN yang mempunyai pengalaman memerintah sejak merdeka hingga sekarang dan dapat menilai arah sebenar politik pengundi dalam setiap pilihan raya yang lebih cenderung kepada sogokan pembangunan semata-mata.

Kesedaran dan perlakuan politik di kalangan mahasiswa di 11 IPT (UKM, UM, UPM, UiTM, UIA, USM, UTM, UPSI UUM, UMS dan UNIMAS) telah dilakukan oleh Mohd Fuad Mat Jali et. al (2005). Beliau mendapati bahawa tahap minat politik di kalangan belia IPT adalah rendah dan hanya 27.2 peratus yang mendaftar sebagai pengundi. Mereka lebih kerap menghadiri ceramah politik di luar kampus yang berhaluan kiri. Mereka juga mempunyai aspirasi mahukan kerajaan lebih prihatin terhadap kebajikan mereka, mewujudkan lebih banyak pekerjaan, memberikan lebih kebebasan bersuara dan membasmi gejala rasuah. Pada hakikatnya , belia IPT mempunyai tiga permintaan asas, iaitu mereka mahukan suara mereka didengar, peranan mereka diiktiraf dan isu mereka ditangani dengan cara yang menjurus kepada belia (Saifuddin Abdullah, 2008). Keaktifan belia berpolitik dalam pilihan raya dapat dikesan melalui cara gaya mereka terlibat dalam berkempen, kehairahan menzahirkan sokongan serta agresifnya mereka menggerakkan jentera parti politik. Trend pengundian belia dikatakan amat signifikan dalam membantu kemenangan sesebuah parti politik, namun fitrah belia yang inginkan idealisme mereka diketengahkan menjadikan pengundian kelompok ini menjurus kepada sokongan kepada pihak kiri.

Kajian pungutan pendapat awam Pra-Pilihan Raya Umum 1999 yang dijalankan di kawasan Kubang Pasu, Kedah, mendapati trend pemilihan parti politik dipengaruhi oleh faktor etnik dan kawasan. Majoriti Melayu (78 peratus) di Kubang Pasu dikenal pasti sebagai kawasan yang menyokong UMNO (BN) dan 22 peratus mengidentifikasikan diri mereka sebagai penyokong parti alternatif (PAS). Jumlah anak muda yang mengikuti fahaman politik ibu bapa (BN) adalah 50 peratus, Barisan Alternatif (15.5 peratus) dan 34.5 peratus tidak mempunyai fahaman politik (Mohd Fuad Mat Jali et al. 2006). Antara isu utama yang diperbincangkan ialah kegawatan ekonomi, agama dan krisis kepimpinan. Analisis juga memaparkan kesanggupan rakyat menukar kerajaan khususnya mereka daripada wilayah timur dan mereka yang tidak berpuas hati dengan pentadbiran kerajaan (Mohd Fuad Mat Jali dan Sabihah Osman , 2002 dan Mohamad Lizal Duwasa, 2000). Perubahan yang berlaku tidak menyeluruh dan sokongan terhadap BN masih besar walaupun mengalami kemerosotan dari jumlah undi di kebanyakan kawasan yang majoritinya Melayu.

Sokongan pengundi muda (belia) dalam pilihan raya kecil DUN Pengkalan Pasir pada Mac 2005 merupakan indikator penilaian kekuatan PAS bertahan di Kelantan. Kemenangan BN di DUN tersebut merupakan satu manifestasi anjakan pemikiran politik pembangunan di kalangan pengundi muda dan veteran. Fenomena ini dianggap sebagai petanda yang mendorong BN bekerja keras untuk berkuasa semula. Walau bagaimanapun, sokongan semula kepada BN akan tercapai dengan syarat BN mesti mengekalkan kerjasama jentera yang erat di kalangan mereka, kesepaduan dalam pimpinan UMNO Kelantan itu sendiri, menepati janji dan melaksanakan projek pembangunan terus menerus (Mohd Fuad Mat Jali & Junaidi Awang Besar, 2006). Pengundi mempercayai hanya parti pemerintah (BN) yang mampu menyediakan pembangunan di bandar atau pun di luar bandar secara berterusan dan beranggapan parti pembangkang kurang mampu membawa perubahan di sesuatu kawasan (Arnold Puyok, 2003; Ghazali Mayudin & Mohd Rizal Mohd Yaakop, 2000; Wan Abdul Rahman Wan Abdul Latif & Mohd Fuad Mat Jali, 2003). Sebaliknya penggunaan isu nasional seperti isu kenaikan harga minyak, isu ketelusan, keadilan, anti rasuah mengatasi politik

pembangunan di kalangan pengundi di kawasan Parlimen Permatang Pauh (Ibrahim Abu Shah et al. 2009).

Belia IPT juga terpengaruh dengan fahaman politik baru atau sivil yang menekankan atau membahaskan secara terbuka mengenai parti yang memperjuangkan isu demokrasi, kesejagatan, nasionalisme, isu tempatan, ekonomi, hak wanita, alam sekitar, pembasmian rasuah dan nepotisme, hak asasi, keselamatan sosial, pendidikan dan kesihatan. Secara puratanya 87.3 peratus pengundi masih mahukan parti atau calon yang memperjuangkan fahaman politik baru tersebut. Kajian yang dilakukan oleh Merdeka *Centere* pada November 2007 pula mendapati bahawa sokongan masyarakat India terhadap pembangkang meningkat dari 60 peratus ke 90 peratus dan kaum Cina dari 45 peratus ke 70 peratus selepas berlakunya perhimpunan BERSIH dan Hindraf (Wan Abdul Rahman Wan Ab. Latif, 2008). Pada hakikatnya, isu-isu seperti Hindraf, perpecahan dalam parti, kelemahan pentadbiran dan dasar, rasuah, politik wang, rusuhan, nepotisme dalam politik negara dan keselamatan sosial telah memberi impak kepada pola sokongan politik belia yang turut sama mencetuskan 'tsunami politik' di Malaysia pada Mac 2008.

MINAT DAN PENYERTAAN

Tahap minat mempengaruhi seseorang menghampiri dan mendalami kefahaman ideologi sesebuah parti politik. Kegiatan belia dalam aktiviti sosioekonomi dan keadaan politik semasa, mencabar dan mempengaruhi minat serta keterampilan berpolitik yang mendukung visi dan misi politik tertentu. Majoriti (43.3 peratus) belia IPT yang ditemui menyatakan minat mereka terhadap politik adalah pada tahap sederhana. Manakala mereka yang berminat dan amat berminat terhadap politik negara masing-masing mencatatkan 21.7 peratus dan 7.7 peratus. Walau bagaimanapun, apabila kita mengaitkan tahap minat dengan kesedaran untuk mendaftar sebagai pengundi dan menjadi ahli parti politik, wujud hubungan yang amat rendah. Didapati 27.7 peratus sahaja yang telah mendaftar sebagai pengundi dan 12.3 peratus pula yang menyatakan telah menjadi ahli sesebuah parti politik dan secara purata 2.2 peratus sahaja di kalangan mereka yang menjadi ahli parti BN. Belia PTPL Kota Kinabalu Sabah yang paling ramai menjadi ahli (7.0 peratus) diikuti oleh UMS (6.2 peratus), Kolej INTI Sabah (4.6 peratus), UNIMAS (4.1 peratus), UPSI (3.3 peratus), UTM (3.1 peratus), UDM (2.8 peratus), UiTM (2.6 peratus) dan USM (2.5 peratus). Fenomena tersebut menunjukkan bahawa ramai belia IPT masih tidak mempunyai identifikasi parti dan tahap keahlian dalam BN amat rendah. Apabila ditanyakan adakah anda mengundi pada pilihan raya umum 2008, hanya 18.2 peratus daripada mereka menyatakan demikian.

Fenomena tersebut boleh dikaitkan dengan pengaruh politik yang berlaku di kalangan belia IPT dan pantulan aktiviti dalam kampus dan di luar kampus. Keadaan ini terbukti apabila penyertaan mereka dalam aktiviti ceramah politik, kursus politik, mesyuarat politik setempat serta mendengar kempen parti politik pembangkang adalah agak tinggi, berbanding dengan kurangnya penyertaan dalam ceramah politik parti kerajaan dan kurangnya minat menyertai kursus Biro Tata Negara (BTN). Ini bermakna belia lebih banyak terdedah dan dipengaruhi politik luar kampus.

SUMBER MAKLUMAT POLITIK

Sumber maklumat politik di kalangan belia IPT amat mempengaruhi pemikiran politik semasa dan identifikasi parti mereka. Maklumat yang dibaca mendedahkan pelbagai perkara termasuklah kebaikan dan keburukan sesebuah parti politik dan maklumat ini digunakan oleh mereka sebagai panduan menilai prestasi sesebuah parti dan juga calon. Berpandukan Jadual 1 sumber maklumat utama belia IPT ialah Akhbar Harian Perdana, diikuti oleh internet, Radio, Televisyen, akhbar parti dan ahli keluarga. Lima sumber yang dibaca atau dilayari oleh mereka dianggap boleh dipercayai dan mudah diperoleh tanpa memerlukan kos yang tinggi. Laman *blog*, SMS, majalah luar negara dan jiran merupakan sumber yang tidak banyak digunakan oleh belia IPT. Sumber politik dari SMS dan majalah luar negara tidak ramai yang menggunakannya kerana masing-masing memerlukan kos dan kebanyakan majalah dalam bahasa Inggeris serta kurang memuatkan perihal dalam negara. Maklumat politik dari jiran amat kecil kerana mereka kurang berinteraksi dengan jiran tetangga dan sebahagian besar masa dihabiskan belajar di Universiti.

Jadual 1: Sumber Maklumat Politik Belia IPT

Rank	Sumber	Peratus	Rank	Sumber	Peratus
1.	Akhbar Harian Perdana	38.7	8.	Rakan seuniversiti	1.7
2.	Internet	23.9	9.	Laman Bolg	1.5
3.	Radio	12.3	10.	Sistem Pesanan Ringkas (SMS)	1.3
4.	Televisyen	7.9	11.	Akhbar dan Majalah luar negara	1.3
5.	Akhbar Parti	4.2	12.	Pemimpin politik setempat	0.4
6.	Ahli Keluarga	4.0	13.	Jiran	0.1
7.	Guru atau Pensyarah	2.4			

Kalau ditinjau dari sudut populariti, internet merupakan sumber maklumat yang popular di kalangan belia IPT. Ia diikuti oleh televisyen, akhbar harian perdana, Guru-Pensyarah dan rakan seuniversiti. Kepopularan internet ada kaitannya dengan perkembangan ICT di Malaysia dan pembangunan Koridor Raya Multimedia (MSC) pada tahun 1995. Malaysia kini mempunyai 3.8 juta pelanggan internet dalam kategori *dial-up* dan 897,200 pelanggan jalur lebar serta 19 juta pelanggan telefon bimbit (G. Manimaram, Ezhar Taman & Abdul Muati@Zamri Ahmad, 2008:70). Ia menunjukkan bahawa media siber amat penting sebagai media alternatif yang menggantikan sumber maklumat konvensional seperti akhbar, televisyen dan radio yang sudah jemu didengari atau ditonton, malahan ia dilihat sebagai propaganda parti pemerintah. Oleh itu, internet dan khidmat pesanan ringkas (SMS) mengambil alih peranan menyebarkan maklumat politik seluas mungkin dan amat berkesan di kalangan belia di IPT. Secara keseluruhan, pada pilihan raya umum 2008, penggunaan perkhidmatan tersebut telah meningkat sehingga 30 peratus menjelang pembuangan undi. *Blog* yang dikendalikan oleh individu,

bekas wartawan media arus perdana dan parti politik menjadi saluran maklumat alternatif penting kepada belia. Internet mempunyai kelebihan dari segi memuat turun berita terkini dan pelbagai maklumat secara atas talian dan menyediakan ruang kepada belia untuk meluahkan rasa hati serta melontarkan pandangan secara peribadi tentang sesuatu topik. Walau bagaimanapun dari aspek kebolehpercayaan maklumat yang disampaikan, internet menduduki *ranking* ketiga selepas akhbar harian perdana dan akhbar parti di kalangan belia IPT.

ASPIRASI

Setiap pengundi diibaratkan sebagai pengguna. Mereka akan memilih parti mana yang dijangkakan dapat memenuhi kehendak atau yang dapat memenuhi harapan mereka. Pilihan mereka dianggap rasional kerana telah mengambil kira pelbagai kos dan ganjaran yang akan diperoleh berbanding dengan yang lain. Setiap individu mempunyai aspirasi yang berbeza terhadap sesebuah parti atau pemimpin yang akan dipilih. Aspirasi individu dipengaruhi oleh antaranya faktor umur, jantina, kaum, pendidikan dan persekitaran. Bagi golongan belia IPT harapan mereka lebih kepada memenuhi kehendak generasi muda dan begitu juga dengan kebajikan, polisi kerajaan dan kepimpinan kampus dan negara.

Berdasarkan aspirasi, belia IPT mahukan kerajaan memperbanyakkan peluang pekerjaan dan meningkatkan bantuan atau pinjaman pendidikan. Mereka juga mengharapkan usaha ditingkatkan untuk memupuk perpaduan, meneruskan Dasar Ekonomi Baru (DEB), prihatin terhadap kebajikan mereka, lebih tegas dalam menangani isu-isu sensitif berkaitan dengan perkauman, pentadbiran yang berintegriti, dan lebih banyak kebebasan bersuara iaitu mencadangkan AUKU dipinda bersesuaian dengan keadaan semasa. Di samping itu mereka juga mahukan kebajikan rakyat miskin dibela, bertindak adil dan saksama serta prihatin terhadap alam sekitar. Dari aspek perlakuan politik yang tidak disenangi oleh belia IPT ialah rasuah (76.3 peratus), diskriminasi (62.6 peratus), mementingkan diri sendiri (58.8 peratus) dan skandal (55.5 peratus). Mereka tidak bersetuju dan menolak demonstrasi sebagai satu cara yang terbaik untuk memperjuangkan hak-hak mereka kerana ia akan mengundang kekecohan dan mengganggu keamanan negara. Bagi memastikan keamanan dijaga mereka mahukan ISA dikekalkan tetapi dengan pindaan yang bersesuaian dengan keadaan semasa.

KRITERIA PEMILIHAN CALON DAN PARTI

Dalam sesuatu pilihan raya, pengundi membuat pilihan berdasarkan calon atau pun parti. Ada yang mengundi simbol parti tanpa dipengaruhi oleh faktor lain manakala ada yang memilih calon tanpa mengambil kira ideologi parti apa yang calon diwakili. Sehubungan itu belia IPT ditanyakan apakah yang dijadikan kriteria bagi memilih calon dan parti mereka. Berdasarkan Jadual 2, calon seagama menjadi kriteria utama di kalangan belia IPT dan diikuti oleh persamaan ideologi, persamaan gender dan tahap pencapaian akademik. Kriteria berasaskan populariti pula, didapati bahawa pencapaian akademik yang teratas, diikuti oleh fahaman agama yang sama dan yang mempunyai latar belakang agama yang baik. Mengikut mereka ketiga-tiga ciri tersebut di samping personaliti kepimpinan calon, diharapkan dapat memandu seseorang ahli politik menjalankan tugas

dan tindakan yang berkesan berlandaskan nilai moral yang baik serta mempunyai integriti yang tinggi.

Jadual 2: Kriteria Pemilihan Calon mengikut Keutamaan dan Populariti

	Kriteria Utama	Peratus (%)	Kriteria berasaskan populariti	Peratus (%)
1.	Seagama	39.5	Pencapaian akademik	23.0
2.	Persamaan ideologi parti	17.4	Seagama	18.0
3.	Persamaan gender	10.9	Latar belakang agama	17.0
4.	Pencapaian akademik	10.6	Persamaan ideologi parti	17.0
5.	Sebangsa/Seetnik	7.5	Sebangsa/seetnik	11.0
6.	Latar belakang agama	6.7	Penampilan diri	5.0
7.	Penampilan diri	5.1	Senegeri	5.0
8.	Senegeri	2.4	Persamaan gender	4.0

Bagi kriteria pemilihan parti politik pula analisis menunjukkan bahawa parti yang memperjuangkan agama dan bangsa menjadi pilihan utama (71.5 peratus), di ikuti 64.8 peratus yang memperjuangkan isu kemanusiaan (seperti ketelusan, keadilan, hak asasi dan anti rasuah), dapat menunaikan janji dalam manifesto dan membasmi kemiskinan (Rujuk Jadual 3).

Jadual 3: Kriteria Utama Pemilihan Parti Politik dalam Pilihan Raya

Kriteria	Peratus (%)
Yang memperjuangkan agama dan bangsa	71.5
Yang memperjuangkan isu kemanusiaan	64.8
Yang memperjuangkan isu pembangunan dan kemiskinan	58.1
Yang mempunyai calon yang berwibawa, bersih dan berpendidikan tinggi	52.5
Yang dapat menunaikan janji-janji dalam manifesto	29.2
Yang mempunyai trek rekod yang baik	26.7
Yang memperjuangkan isu nasionalisme dan global	19.4

Berdasarkan analisis dapatlah dirumuskan bahawa kebanyakan belia IPT memilih parti politik yang bertunjangan imej agama namun masih berasaskan bangsa dan memperjuangkan isu kemanusiaan. Justeru, parti politik haruslah meletakkan calon yang memiliki pengetahuan agama yang tinggi, berakhlak mulia, dan mesra rakyat serta mempunyai asas perjuangan bangsa yang kukuh agar masyarakat tempatan terus memberi sokongan kepada sesebuah parti politik.

SOKONGAN PARTI

Majoriti daripada mahasiswa tidak mempunyai identifikasi parti yang tetap, kerana ianya boleh berubah apabila mereka mengalami proses sosialisasi dan pembelajaran. Justeru hasil kajian mendapati pilihan politik mereka berbeza mengikut IPTA. BN mendapat pilihan yang tinggi di kalangan belia IPT iaitu 43.1 peratus, PAS 17.4 peratus, PKR 14.3 peratus, Bebas 5.6 peratus dan DAP 4.1 peratus. Sokongan parti kerajaan (BN) berasaskan aspirasi mengikut Universiti menunjukkan bahawa UNIMAS, UMS, PTPL Kota Kinabalu, UUM, UiTM, UMP, UTHM memberi sokongan yang tinggi terhadap BN. Belia IPT juga ditanyakan apakah parti yang mereka akan sokong pada pilihan raya umum (ke-13) yang akan datang, 45.6 peratus menyatakan akan menyokong BN, 32.1 peratus akan menyokong parti pembangkang, 6.7 peratus parti lain dan 15.6 peratus menyatakan tidak pasti. Apa yang menarik pada pola sokong tersebut adalah peratusan yang menyatakan tidak pasti adalah agak tinggi dan juga terdapat yang memilih parti lain, ini bermakna perbezaan sokongan antara BN dengan pembangkang hanyalah 2.1 peratus. Peratusan yang kecil pembangkang mendahului BN tidak lihat sebagai situasi yang merunsingkan, kerana sokongan mereka terhadap kerajaan akan berubah menjelang pilihan raya umum yang akan datang. Kalau dilihat dari aspek sokongan kepada BN pada pilihan raya akan datang mengikut IPT, hanya 10 daripada 32 IPT yang menyatakan akan menyokong kerajaan iaitu UniMAS, UiTM, UMK, UMT, UTHM, PTPL Sg. Petani dan Kota Kinabalu, Kolej Teknologi Bestari dan Kolej *Twin Tech*. IPT yang belianya menyatakan tidak akan menyokong BN pada pilihan raya akan datang dipaparkan dalam Jadual 4.

Jadual 4 : Senarai Belia IPT yang Tidak Menyokong Kerajaan (BN) pada Pilihan Raya Akan Datang

IPT TIDAK MENYOKONG KERAJAAN					
BIL	IPTA	%	BIL	IPTS	%
1	Universiti Sains Islam Malaysia (USIM)	77.4	1	<i>Help College</i>	91.1
2	Universiti Islam Antarabangsa Malaysia (UIAM)	70.9	2	<i>Nilai International College</i>	84.1
3	Universiti Darul Iman (UDM)	65.1	3	Kolej Segi	73.7
4	Universiti Teknologi Malaysia (UTM)	64.4	4	UTAR	71.1
5	Universiti Pertahanan Malaysia (UPNM)	61.2	5	<i>Inti International College Nilai</i>	57.3
6	Universiti Pendidikan Sultan Idris (UPSI)	56.5	6	Kolej Teknologi Darul Naim	52.6
7	Universiti Teknikal Malaysia Melaka (UTeM)	56.0	7	Kolej Inti Sabah	51.0

Nota: 8 lagi IPTA ialah: UKM (55.6%), UM (54.6%), USM (54.0%), UUM (53.2%), UPM (52.7%), UMP (52.0%), UniMAP (50.8%) dan UMS (50.5%)

Parti pembangkang PAS menjadi parti yang disokong kerana mereka menganggap parti ini bersedia menegur kerajaan, komited dengan dasar perjuangan Islam, mempunyai calon yang berpengetahuan agama yang tinggi dan di kalangan profesional, kurang mempunyai masalah dalaman parti dan mempunyai dasar dan perjuangan yang konsisten. Sebaliknya UMNO kurang diminati kerana sering dilanda dengan masalah dalaman, politik wang, terlalu bertolak ansur tidak tegas dengan isu kebangsaan, kurang prihatin terhadap aspirasi rakyat bawahan dan matlamat perjuangan parti mudah berubah apabila menghadapi tekanan.

Jika ditinjau sokongan terhadap kerajaan berasaskan aspirasi dan dalam pilihan raya akan datang, hasil kajian menunjukkan belia Melayu IPT mencatatkan peratusan keahlian dalam BN yang tinggi berbanding dengan belia bukan Melayu. Namun keadaan ini tidak memberi kesan positif kepada sokongan mereka terhadap BN dalam pilihan raya akan datang (lihat Jadual 5). Peratusan tidak menyokong BN berkurangan dan keadaan tersebut sama bagi belia yang berbangsa Cina dan India dan peratusan tidak menyokong kerajaan dalam pilihan raya akan datang meningkat lebih tinggi. Sebaliknya pola yang berbeza bagi belia IPT Bumiputera Sabah dan Sarawak, sokongan mereka terhadap kerajaan meningkat.

Jadual 5: Sokongan Belia IPT terhadap Kerajaan berdasarkan Bangsa

Bangsa	Ahli BN	Sokongan berdasarkan aspirasi		Sokongan BN akan datang (PRU-13)*	
		sokong	Tidak sokong	sokong	Tidak sokong
Melayu	8.8	38.5	34.2	34.3	38.4
Cina	1.3	7.7	6.7	5.0	9.5
India	0.6	2.1	1.9	1.6	2.4
Bumiputera Sabah/Sarawak	1.1	5.9	2.3	4.4	3.8
Lain-lain	0.2	0.4	0.3	0.4	0.3

Nota: *PRU-13 = Pilihan raya Umum ke-13

Berdasarkan aspirasi pola pilihan belia terhadap BN adalah tinggi tetapi dalam pilihan raya akan datang (PRU ke-13) memperlihatkan peratusan yang menyokong kerajaan menurun kecuali mereka yang dari Sabah dan Sarawak. Fenomena ini masih terlalu awal untuk dimanifestasikan kerana dalam beberapa tahun akan datang persepsi negatif terhadap kerajaan mungkin dapat diatasi dengan kebijaksanaan kepimpinan baru di bawah teraju Perdana Menteri Dato' Seri Najib Razak dan Timbalannya Tan Sri Muhyiddin Yassin. Mengikut mereka sokongan kepada kerajaan akan meningkat sekiranya kerajaan dapat memenuhi aspirasi dan kebajikan belia IPT dan dapat menunaikan janji-janji mengikut manifesto pilihan raya umum yang ke-12 (2008). Mewujudkan lebih banyak peluang pekerjaan atau mengatasi masalah pengangguran di kalangan graduan dijangka akan menjadi sebagai tunjang

yang mampu menarik semula belia kepangkuan kerajaan.

KEPIMPINAN

Secara keseluruhannya pucuk pimpinan yang diketuai oleh Datuk Seri Abdullah Ahmad Badawi dan Timbalannya Dato' Seri Najib Abd Razak dianggap oleh belia IPT sebagai pemimpin yang cemerlang dalam membangunkan negara. Mereka diterima sebagai gandingan pemimpin yang mantap, cekap dan sentiasa memupuk perpaduan. Majoriti (82.1 peratus) berpuas hati dan memberi tahap baik bagi usaha pembangunan ekonomi yang dijalankan oleh pucuk pimpinan Parti Barisan Nasional (BN). Kaum Melayu, Cina dan India berpandangan dasar dan politik negara diurus dengan baik oleh BN. Bagi anggota kepimpinan kerajaan pula, 61.1 peratus daripada belia IPT menyatakan di tahap baik dan 5.3 menyatakan cemerlang. Alasan yang diberikan oleh mereka ialah majoriti pemimpin kerajaan mempunyai kelayakan akademik yang tinggi, sentiasa mementingkan perpaduan kaum, mesra dan berjiwa rakyat, mempunyai karisma dan ketokohan, cekap dan berwibawa. Belia IPTA telah memilih Datuk Seri Najib Tun Razak (TPM) sebagai pemimpin yang paling layak menggantikan Perdana Menteri (Datuk Seri Abdullah Ahmad Badawi) apabila beliau bersara dan Tan Sri Muhyiddin Yassin pula telah dipilih sebagai gandingan terbaik bagi Dato' Seri Najib Tun Razak.

IMPLIKASI DASAR

Peratusan belia IPTA yang tidak mendaftar sebagai pemilih adalah tinggi dan ini akan memberi kesan pada peratusan yang layak mengundi apabila pilihan raya diadakan. Mereka perlu didaftarkan dan diberi rasa tanggungjawab untuk mengundi. Untuk mengatasi masalah ini dicadangkan pendaftaran sebagai pengundi diadakan semasa pelajar mula mendaftar masuk ke universiti. Proses pendaftaran boleh dibuat di peringkat Fakulti atau Jabatan masing-masing dengan kerjasama Suruhanjaya Pilihan Raya (SPR). Bermakna apabila mereka mendapat Kad Pelajar secara automatik mereka telah terdaftar sebagai pengundi. Taklimat dari SPR dijadikan salah satu atur cara semasa minggu suai kenal di setiap universiti. Pihak universiti boleh membuat peraturan hanya mereka yang telah mendaftar sebagai pengundi sahaja dibenarkan mengundi dalam pilihan raya Majlis Perwakilan Pelajar (bagi mereka yang telah mencapai 21 tahun sahaja).

Isu yang penting bagi belia IPT adalah kebajikan dan peluang pekerjaan. Mereka mudah menyalahkan pihak kerajaan apabila mereka tidak mendapat kerja apabila keluar dari IPTA dan IPTS. Satu badan perlu ditubuhkan untuk memantau siswazah yang tidak bekerja. Pusat Khidmat Kerjaya Siswazah perlu ditubuhkan sama ada di peringkat nasional, negeri atau daerah untuk memberi khidmat mengenai hal-ehwal kerjaya siswazah. Institut Latihan Siswazah juga perlu ditubuhkan bertujuan untuk memberi latihan semula dalam bidang teknikal, IT, pengurusan, perniagaan dan kemahiran yang selaras dengan kehendak pasaran semasa. Skim pegawai sangkut perlu terus diwujudkan.

Sokongan politik pembangkang di IPTA masih kuat. Keadaan ini akan

mempengaruhi pola pengundian di peringkat nasional dan kampus. Oleh itu dicadangkan Puteri dan Pemuda UMNO perlu merapati mahasiswa-i dengan cara mengadakan lebih banyak aktiviti seperti ceramah,/dialog, seminar, lawatan dan bantuan yang diperlukan. Pemimpin di peringkat nasional dan negeri juga perlu kerap mendampingi mahasiswa-i dengan menyertai aktiviti yang dianjurkan. Pengurusan universiti perlu memikirkan strategi mengawal unsur-unsur politik luar (pembangkang) meresapi kampus. Memperbanyakkan aktiviti yang bersifat perpaduan kaum, mesra pemimpin dan pentadbir universiti, khidmat masyarakat di kawasan Dewan Undangan Negeri (DUN) atau Parlimen dan sebagainya. Kursus Kenegaraan (ZT) yang wajib diambil oleh semua pelajar perlu digubal semula dengan memasukkan unsur patriotik, tokoh-tokoh negarawan, perjuangan parti-politik, elemen perpaduan dan unsur-unsur lain yang dapat memberi kesedaran, cintakan parti dan negara bangsa. Kursus Biro Tatanegara (BTN) diwajibkan kepada semua pelajar dan pendekatan baru, menarik dan tidak dianggap sebagai kursus propaganda kerajaan.

KESIMPULAN

Dapatlah dirumuskan bahawa minat belia IPT dalam politik adalah di peringkat sederhana dan peratusan yang telah mendaftarkan diri dengan SPR sebagai pengundi amat rendah. Majoriti mengiktiraf dan menyokong kepimpinan Perdana Menteri Datuk Seri Abdullah Ahmad Badawi dan Timbalannya Dato' Seri Najib Razak baik dalam membangunkan negara, bijak dan berani serta mesra rakyat. Aspirasi mereka agar pihak kerajaan lebih prihatin terhadap kebajikan dan dapat menyediakan peluang pekerjaan yang setimpal dengan kelulusan mereka. Kegiatan sebahagian daripada belia IPT dalam aktiviti politik di luar kampus dan ada yang terlibat dalam kempen parti pembangkang, memaparkan pola yang tidak menyenangkan dan ianya menjadi salah satu faktor yang menyebabkan sokongan terhadap BN di kalangan belia IPT berkurangan. Oleh itu, adalah menjadi tanggungjawab pimpinan baru Perdana Menteri dan timbalannya untuk merancang strategi dan program memenuhi aspirasi belia IPT agar mereka meneruskan semula tradisi menyokong kerajaan pada pilihan raya umum ke-13 kelak.

RUJUKAN

- Arnold Puyuk. 2005. 'The 2004 Ba'Kelalan ByElection in Sarawak, East Malaysia: The Lun Bawang Factor and Whither Representative Democracy in Malaysia', in *Contemporary Southeast Asia*, 27, No.1: 64-79.
- G. Manimaran, Ezhar Taman & Abdul Muati@Zamri Ahamd. 2008. 'Pilihan Raya Umum 2008 Isu dan Implikasi Politik Baru di Malaysia', *Pemikir*, April-Jun, Bil:52: 65-98, Bangi: Utusan Karya Sdn. Bhd.
- Ghazali Mayudin & Mohd Rizal Yaakob. 2000. 'Pilihan raya kecil Dewan Undangan Negeri Lunas', *Laporan Projek Penyelidikan*, Bangi: Fakulti Sains Sosial dan Kemanusiaan, tidak diterbitkan: 1-32.

- Ghazali Mayudin. 2006. Demokrasi dan Pilihan Raya di Malaysia. Dlm. Ghazali Mayudin, Jamaie Hamil, Sity Daud & Zaini Othman (Pnyt.) *Demokrasi kepimpinan dan keselamatan dalam politik Malaysia*. Bangi: Penerbit Universiti Kebangsaan Malaysia: Hlm 50-51.
- Gomez, E.T. 1996. *The 1995 Malaysian General Election: A Report and Commentary*, Singapore: Institute of Southeast Asian Studies.
- Grenfell, N. 1979. *Switch on: switch off, mass media audiences in Malaysia*, Kuala Lumpur: Oxford University Press.
- Ibrahim Abu Shah, Shireen Haron, Norshidah Nordin, Shaharuddin Badaruddin, Mat Zin Mat Kib, Yadman Sarwan, S. Salahuddin Suyurno, Zulkifli Dahalan, Mujibu Muis & Shu'aibi Zainal Abidin. 2009. Kajian Pilihan Raya Kecil Parlimen Permatang Pauh: Pertembungan Strategi Yang Berbeza. Dlm Worrn Hj. Kabul, Shireen Haron, Mat Zin Mat Kib & Abdul Kadir Rosline. *Prosiding seminar politik Malaysia: Landskap politik Malaysia pasca pilihan raya ke-12*. Sabah: Pusat Penerbitan Universiti (UPENA), Universiti Teknologi MARA.
- Mohamad Lizal Duwasa. 2000. Pilihan Raya Umum. 2004: Tinjauan Awal Terhadap Penglibatan Golongan Tua Di Kampung Serkam, Melaka. *Kertas Projek*. Jabatan Geografi. UKM (Tidak diterbitkan).
- Mohd Fuad Mat Jali, Rashila Ramli & Mohd Yusof Kasim. 2005. `Minat, Aspirasi dan Pilihan Politik Belia: Kajian Kes dikalangan Mahasiswa Institusi Pengajian Tinggi Awam (IPTA) Malaysia', dlm Rohany Nasir, Hazita Azman, Ruzy Suliza Hashim, Mohd Yusof Hj. Abdullah & Rozmi Ismail (Pnyt.), *Prosiding Seminar Penyelidikan Pembangunan Generasi Muda: Realiti Generasi Muda Melangkah ke hadapan*, UKM: Fakulti Sains Sosial dan Kemanusiaan: 113-120.
- Mohd Fuad Mat Jali & Junaidi Awang Besar. 2006. `Pilihan raya kecil Dewan Undangan Negeri (DUN) Pengkalan Pasir: Petanda BN berkuasa semula di Kelantan, Stanislaus Sandarupa (Pnyt.), *Kemelayuan Indonesia dan Malaysia*, Vol: II, Jakarta: Departemen Kebudayaan dan Pariwisata RI: 241-253.
- Mohd Fuad Mat Jali, Ahmad Nidzamuddin Sulaiman dan Zaini Othman. 2001. *Pra-pilihan raya umum 1999. Analisis pungutan pendapat di negeri Kedah Darul Aman*. Seminar Fakulti Sains Kemasyarakatan dan Kemanusiaan ke-4. Bangi: Universiti Kebangsaan Malaysia.
- Mohd Fuad Mat Jali & Sabihah Osman. 2002. `Politik Wilayah dan Politik Nasional dalam Pilihan Raya Umum 1999', Mohd Yusof Kasim dan Azlan Ahmad (Pnyt.), *Politik Baru dalam Pilihan Raya Umum*, Bangi: Penerbit Universiti Kebangsaan Malaysia:117-146
- Saifuddin Abdullah. 2008. *POLITI BARU Mematangkan Demokrasi Malaysia*, Kuala Lumpur: Institut Terjemahan Negara Malaysia.
- Syed Arabi Idid & Mazni Hj. Buyong. 1995. *Malaysia's General Election 1995. People, Issues and Media use*. Bangi: Jabatan Komunikasi, Universiti Kebangsaan Malaysia dan Asia Foundation (Kuala Lumpur).

- Wan Abdul Rahman Wan Ab. Latif. 2008. 'Politik Feng Shui: Pengundi Cina dan Pilihan Raya Umum ke-12', *Makmal Sakhti 2008*, Wilayah Persekutuan: Jundi Resources
- Wan Abdul Rahman Wan Abdul Latif & Mohd Fuad Mat Jali. 2003. 'Pilihan raya DUN Sarawak 2001: Satu analisis ekonomi politik', *Jebat*, Bangi: Pusat Pengajian Sejarah, Politik dan Strategi, Fakulti Sains Sosial dan Kemanusiaan, Universiti Kebangsaan Malaysia: 23-41
- Zulkanain Abdul Rahman, Mohammad Redzuan Othman, Amer Saifude Ghazali, Shaharuddin Badaruddin & Md. Rozimi Md Nasir. 2009. *Persoalan Dan Makna Di Sebalik Pilihan Raya Kecil Permatang Pauh*. Dlm Worrn Hj. Kabul, Shireen Haron, Mat Zin Mat Kib & Abdul Kadir Rosline. *Prosiding seminar politik Malaysia: Landskap politik Malaysia pasca pilihan raya ke-12*. Sabah: Pusat Penerbitan Universiti (UPENA), Universiti Teknologi MARA.

Profil Penulis

Mohd Fuad Mat Jali, PhD.
Profesor Madya
Pusat Pengajian Sejarah
Fakulti Sains Sosial dan Kemanusiaan
Universiti Kebangsaan Malaysia
fuad@ukm.my

Yahaya Ibrahim, PhD.
Profesor
Timbalan Naib Canselor
Hal Ehwal Pelajar dan Alumni
Universiti Malaysia Terengganu
ya@umt.edu.my

Noor Aziah Mohd Awal
Prof. Madya
Pensyarah
Fakulti Undang-Undang
Universiti Kebangsaan Malaysia
naha@ukm.my

Abdul Halim Sidek
Prof. Madya
Ketua Pegawai Eksekutif
Institut Penyelidikan Pembangunan Belia Malaysia
Kementerian Belia dan Sukan Malaysia
a.halim@kbs.gov.my

Khaidzir Ismail, PhD.
Timbalan Dekan Hal Ehwal Pelajar
Universiti Kebangsaan Malaysia
khaidzir@ukm.my